

Viðauki C.**SJÚKRAKASSI****LYF:**

Parasetamóltöflur	(nr.03.30)	2 x 20 stk
Saltvatn 0,9% skolvökvi	(nr. 10.20)	1 x 160 ml

UMBÚÐIR OG ÁHÖLD:

Augnbaðglas, einnota	(nr.200)	2 stk
Flísatöng	(nr.404)	1 stk
Sáraböggull Nr. 14, sæfð	(nr.274.1)	4 stk
Sáraböggull Nr. 15, sæfð	(nr.274.2)	4 stk
Skyndiplástur 1 m x 6 cm	(nr.260.2)	1 pk
Skyndiplástur ca 25 stk.	(nr.262)	1 pk
niðurklíptur		
Heftiplástur 5 m x 2,5 cm	(nr.256.1)	1 rúlla
Skæri, bein, sljó/ydd, 13 cm	(nr.428)	1 stk.

Nr. 305

16. júní 1989

S A M Þ Y K K T**um hundahald í Reykjavík.****1. gr.**

Hundahald er bannað í lögsagnarumdæmi Reykjavíkur.

2. gr.

Borgarstjórn er heimilt að veita lögráða einstaklingum, sem búa í Reykjavík undanþágu frá 1. gr. og leyfi til hundahalds í lögsagnarumdæmi Reykjavíkur með eftirfarandi skilyrðum:

- Leyfi er bundið við nafn og heimilisfang lögráða einstaklings og er óheimilt að framselja það.
- Ef sótt er um leyfi til að halda hund í fjölbýlishúsi, skal skriflegt samþykki allra íbúðareigenda í sama stigagangi fylgja umsókn. Sé um að ræða raðhús eða parhús skal samþykki aðliggjandi íbúða (íbúðar) fylgja umsókn. Í fjölbýlishúsi, þar sem sérinngangur fylgir íbúðum, þarf samþykki allra íbúðaeigenda.
- Leyfisgjald vegna undanþágu skal greiða til borgarsjóðs og setur borgarstjórn árlega gjaldskrá, sem heilbrigðisráðherra staðfestir. Við ákvörðun gjaldsins skal tekið mið af þeim kostnaði, sem leiðir af framkvæmd samþykktar þessarar. Gjaldið skal greitt í fyrsta sinn við skráningu hundsins og síðan fyrirfram árlega með gjalddaga 1. janúar. Hafi gjaldið eigi verið greitt innan 2ja mánaða frá gjalddaga fellur leyfið úr gildi.
- Skylt er leyfishafa að hafa hundinn ábyrgðartrygðan og getur borgarstjórn ákveðið að gera heildarsamning við tryggingarfélag, eitt eða fleiri. Skal tryggingin ná til alls þess tjóns, sem dýrið kann að valda mönnum, dýrum, gróðri og munum.
Vottorð um ábyrgðartryggingu skal liggja fyrir við greiðslu leyfis og greiðslu árlegs leyfisgjalds.
- Hundar skulu færðir til hreinsunar í október – nóvember ár hvert. Um hreinsun þeirra og gjald fyrir hana fer eftir reglugerð um varnir gegn sullaveiki nr. 201/1957. Framvísa skal vottorði um hreinsun við greiðslu árlegs leyfisgjalds.
- Hundurinn skal ávallt bera ól með plötu um hálsinn. Á plötuna skal greypt skráningar-númer hundsins og símanúmer eiganda hans.
Einnig skal við ólina festa merki, sem sýna að leyfisgjald hafi verið greitt og hundur

hreinsaður. Hundaeiganda ber að tilkynna Heilbrigðiseftirliti Reykjavíkur um aðsetur-skipti. Einnig skal hann tilkynna eftirlitinu ef hundurinn drepst eða er fluttur úr lögsagnarumdæminu.

- g. Leyfishafi skal gæta þess vel að hundur hans valdi ekki hættu, óþægindum eða óþrifnaði né raski ró manna. Hundar skulu ávallt vera í taumi utan húss, sbr. þó i-lið 3. mgr. þessarar greinar.

Leyfishafa er skylt að fjarlægja saur eftir hundinn.

- h. Eigi má hleypa hundum inn í almenningsfarartæki, leikvelli eða aðra þá staði, sem um ræðir í IX.–XV. kafla og í XVIII. kafla heilbrigðisreglugerðar nr. 45/1972, en þeir eru:

1. Gistihús (gistiskálar, söluskálar og tjaldbúðir) matsölur og aðrir veitingastaðir.
2. Skólar, kennslustaðir og barnaheimili, þar með talin sumardvalarheimili og dagvistarheimili.
3. Rakarastofur, hárgreiðslustofur og hvers konar aðrar snyrtistofur.
4. Heilbrigðisstofnanir, hæli, íþróttastöðvar og baðstaðir.
5. Fangelsi og aðrar vistarverur handtekinna manna.
6. Samkomuhús.
7. Kirkjugarðar, bálstofur, líkhús og líkgeymslur.
8. Húsakynni, þar sem framleidd eru eða seld matvæli og aðrar neysluvörur.

- i. Óheimilt er að fara með hunda í almenningsgarða borgarinnar svo og um Bankastræti, Laugaveg að Rauðárstíg, Lækjartorg og Austurstræti. Ennfremur er óheimilt að fara með hunda á eftirtalin útivistarsvæði: Öskjuhlíð, Elliðarárdal og Viðey.

Ákvæði staflíða h. og i. gilda ekki um hunda, sem notaðir eru til löggæslu eða björgunarstarfa, né leiðsöguhunda blindra eða sjónskertra.

Heimilt er að sleppa hundum lausum um eftirtalin svæði:

1. Geirsnef.
2. Geldingarnes.
3. Auð og ónýtt svæði fjarri íbúðabyggð.

Borgarráð getur veitt undanþágu frá ákvæðum þessarar greinar í sérstökum tilvikum.

- j. Hundar úr öðrum lögsagnarumdæmum mega ekki án leyfis heilbrigðiseftirlits dvelja lengur en eina viku í Reykjavík.

Ef brotin er skilyrði þessarar greinar varðar það refsingu samkvæmt 7. gr. sektum eða varðhaldi.

3. gr.

Umsókn um leyfi til hundahalds skal senda Heilbrigðiseftirliti Reykjavíkur, sem gefur út umbeðið leyfi að fengnu samþykki borgarstjórnar.

Upplýsingar um hundinn skal færa í þar til gerða bók hjá Heilbrigðiseftirlitinu. Þar skal skrá heiti, aldur, kyn, tegund, litarhátt og önnur einkenni hundsins. Þar skal einnig skrá nafn og heimilisfang leyfishafa. Ársfjórðungslega skal senda embætti lögreglustjóra í Reykjavík skrá um leyfða hunda.

Leyfishafi fær afhenta merкта plötu, sbr. f. lið 2. gr., og eintak af samþykkt um hundahald í Reykjavík.

Eigi er skylt að sækja um leyfi fyrir en þeir hafa náð 3ja mánaða aldri.

Vitji leyfishafi ekki leyfis innan mánaðar frá því að það er veitt fellur það sjálfkrafa úr gildi.

4. gr.

Ef leyfishafi brýtur gegn ákvæðum samþykktar þessarar eða öðrum reglum, sem um hundahald gilda, getur borgarstjórn afturkallað leyfið.

Einnig getur borgarstjórn afturkallað öll leyfi til hundahalds telji hún þess brýna þörf.

5. gr.

Heilbrigðiseftirlitið eða aðilar á þess vegum annast framkvæmd og eftirlit með hundahaldi í Reykjavík og getur það leitað aðstoðar lögregluþingvalda, þegar þörf krefur.

Borgarstjórn setur reglur um nánari framkvæmd reglna þessara, svo sem um eftirlit, hreinsun, hundageymslu og hvaða starfsfólk annist þá þætti.

6. gr.

Hundar, sem ganga lausir utanhúss, skal handsama og færa í sérstaka hundageymslu. Sama gildir um hættulega hunda og óleyfilega hunda.

Kostnaður við töku og geymslu hunda skal að fullu greiddur af eigendum.

Hættulegum hundum er heimilt að lóga þegar í stað.

Aðra hunda er heimilt að afhenda, ef leyfi er framvísað innan 10 daga frá því hundurinn kom í vörslu eftirlitsmanns, enda verði áfallinn kostnaður greiddur. Að öðrum kosti skal hundinum lógað.

7. gr.

Brot gegn samþykkt þessari varða sektum eða varðhaldi.

Með brot út af samþykktinni skal farið að hætti laga um meðferð opinberra mála og að öðru leyti í samræmi við ákvæði laga nr. 81/1988, VI. og VII. kafla.

8. gr.

Framangreind samþykkt borgarstjórnar Reykjavíkur staðfestist hér með skv. 22. gr. laga nr. 81/1988, um hollustuhætti og heilbrigðiseftirlit og 1. gr. laga nr. 7/1953, um hundahald og varnir gegn sullaveiki til þess að öðlast gildi þegar við birtingu. Jafnframt fellur úr gildi samþykkt um hundahald í Reykjavík nr. 385/1984.

Ákvæði til bráðabirgða.

Leyfi til hundahalds, sem veitt hafa verið fyrir gildistöku samþykktar þessarar, halda gildi sínu. Að öðru leyti gildir samþykktin að fullu um þau leyfi.

Heilbrigðis- og tryggingamálaráðuneytið, 16. júní 1989.

Guðmundur Bjarnason.

Ingimar Sigurðsson.

AUGLÝSING**um staðfestingu á breytingu á aðalskipulagi Reykjavíkur.**

Samkvæmt ósk borgarstjórnar Reykjavíkur hefur skipulagsstjórn ríkisins hinn 31. maí 1989, sbr. 3. mgr. 19. gr. skipulagslaga nr. 19/1964 fallist á og staðfest þá breytingu á aðalskipulagi Reykjavíkur 1984–2004 að landnotkun á hluta svæðis milli Hraunbæjar og Bæjarháls verður blandað íbúðar- og útivistarsvæði í stað útivistarsvæðis.

Félagsmálaráðuneytið, 15. júní 1989.

F. h. r.

Berglind Ásgeirsdóttir.

Hólmfríður Snæbjörnsdóttir.